

ANTILIN'I MAD' BASIKANA

**BOKY HO AN'NY
NIPYANDRAHITRA
FOKONDICHA**

- SAMPANA IMPIA MALANA -

Haga- Eric



TENY MIALOHA

Tamin'ny taona 1907, tao amin'ny Nosy Brownsea, dia nitarika lasy skoto voalohany i Baden Powell. Tamin'izay fotoana izay dia zatovo 20 no niaraka taminy. Ankehitriny kosa 20 tapitrisa ny isan'ny skoto maneran-tany. Miankina betsaka amin'ny firotsahan'ny olon-dehibe ao amin'ny fikambanana, hiaraka amin'ireo tanora an'arivony ny fahavitrihan'ny fikambanana : raha matoky ny tanora sy vonona hatrany hamaly ny antson'ny fikambanana ireo olon-dehibe, raha mihaino ny hetahetan'ny zatovo ka mandrisika azy hatrany handray an-tanana ny fiainany amin'ny alalan'ny fomba fanabeazana manavaka ny skoto izy, dia hitohy hatrany ny firoborobon'ny skotisma eran-tany.

Nanapa-kevitra ianao ho mpiandraikitra tafika ato amin'ny Antilin'i Madagasikara, manasa anao ary hirotsaka fa tsy ho mpitan-damba amin'inty andraikitra hafa kely sy mahaliana inty dia ny fanabeazana tanora amin'ny alalan'ny skotisma. Koa indro atolotra anao ny fomba fiasa skoto sy ny tolo-panabeazana hahafahan'ny tanora faran'izay be indrindra miaina skotisma avo lenta.

Boky fikirakira hoentinao manatanteraka ny andraikitrao inty, ka ho hitanao ato aorian'ny fampahatsiahivana ny niandohan'ny skotisma, ny fomba fanabeazana skoto sy ny teti-pibeazana mpiandalana, ary ny fanehoana mpiandalana.

Mahereza!

NY NIANDOHAN'NY SKOTISMA

Vao zaza 9 taona, niara-nilalao tamin'ny rahalahiny nihaza bitro tao an'ala i B.P, no efa nanomboka nitsiry tao an-tsainy ny " skotisma ". Taty aoriana, rehefa niditra ho miaramila izy dia mbola tsy afaka tao an-tsainy ihany ny fiainany fahazaza ka nampihariny tamin'ny fanofanana ireo miaramilany ary nahazoany vokatra tsara. Fa ny ady nataony tany Afrika no tena nahafahany nampihatra ireo zavatra hainy tamin'ny fahazazany.

Ny hevitra ny teny hoe : skoto dia miaramila manolo-tena hialoha lalana ny namany, hisava lalana, hanadihady ny tokony hatao sy haleha amin'ny tany miady.

Nantsoin'i B.P. hoe : " skoto " koa ireo olona milatsaka an-tsitraro hamaky lay na hianefitra any amin'ny tany tsy fantatra na dia tsy misy ady aza. Noderainy ny firotshan'izy ireny an-tsitraro, ny herim-po sy ny fahadiovam-po, ny faharanitan-tsaina sy ny fahaizana mandini-javatra ary ny hakingana nasehony.

Mahay mandini-javatra sy manatsoaka hevitra ireo Zoulou sy foko hafa tao Afrika nifanerasera tamin'i B.P. Nampihariny tamin'ny fanofanana ny miaramilany koa ny traikefa azony avy amin'ireo hatrany Inde, toerana niasany taorian'ny nialany tao Afrika. Ny tena nokendreny dia ny hahatonga ireo miaramila hahavita zavatra samy irery sy hahavaha olana samy irery, izany hoe hahaleo tena.

Fa ny fanandramana goavana sy nahomby nataony dia ny tao Mafeking. Raha nataon'ny Boers fahirano ny miaramilany : ankizy lahy no nampiasainy hitondra hafatra sy hitsirika fahavalo. Teo no nahatsapany fa raha itokisana ny zatovo ka omena andraikitra, dia milofo sy manao vy very ny ainy hanatanteraka izay antenaina aminy. Taorian'izany no nanoratany ilay boky kely hoe "Aids to scouting".

Rehefa tafaverina tany Angleterre i B.P dia naniry hitaiza ny ankizy amin'ny fitiavan-tanindrazana. Nanadihady fatratra ny fomba fanabeazana tamin'ny firenena maro izy, niady hevitra tamin'ny namany ary nanapa-kevitra hampihatra izay fantany tany amin'ny lasy nataony tany Brownsea tao Pool Harbour ny Aogositra 1907.

Fahombiazana koa iny lasy iny, ary ilay boky kely "Scouting for boys " no mirakitra ny foto-kevitra azony vokatry ny zava-bita tany. Natonta voalohany tamin'ny 1908, ary nadika tamin'ny teny frantsay hoe : " Eclaireur " io boky io.

Nahaliana ny lehibe sy ny zatovo ny voalazan'ny boky, ka maro no niezaka nampihatra azy. Niforona ny fikambanana "Boy Scout association".

Rehefa nivelatra haingana ny Skotisma dia nanoro hevitra an'i B.P ny Mpanjaka Edouard VII , hametra-pialana amin'ny tafika ka hanokana ny fiainany amin'ny fampiroboroboana ny foto-kevitra skoto.

**NY FOMBA FANABEAZANA
SKOTO SY NY
TETI-PIBEAZANA MPIANDALANA**

Ny skotisma sy ny Mpiandalana

Tsapan' i Baden Powell fa nitsiriritra ilay fiainana hafa kely koa ireo tanora zokiny. Noho izany nanoratra boky atao hoe : "Rover to success" (La route du succès) nanazavany mikasika ny lalana izy. Avy amin'izay no nipoiran' ny sampana Mpiandalana.

Ny kendren'ny mpiandalana

Ny zava-kendren'ny mpiandalana dia ny fiomanana sahady amin'ny fiainan'ny olon-dehibe, mba ho tonga olom-pirenena vanona sy ilaina ary mandray andraiki-panorenana eo amin'ny fiaraha-monina misy azy. Tsy ho mpijery fotsiny fa hirotsaka sy ho mpitarika ary ho fanoitran' ny fiaraha-monina. Olona mahatsapa adidy sy mandray andraikitra eo amin'ny fiangonana sy ny firenena .

Tsy variana amin'ny Anjoria etsy sy eroa fotsiny, fa tena efa mikaroka ny tarigetra sy ny lalàm-piainana marina ny mpiandalana.

- Matoky tena izy.
- Tsy manaiky lembehana fa manana ny heviny.
- Tsy tia didy jadona fa manaja ny fifanakalozan-kevitra.

Ny misedra ny tenany no tiany, ary mamy aminy ny miara-manao zavatra ao anatin'ny firaisankina sy fifankatiavana.

— Efa miatrika ny tena fiainana izy ary mifototra hampandroso ny tenany, ny fianakaviany, ny Tanindrazany sy ny Fiangonana.

Zara-taona : 17 taona ka hatramin'ny 21 taona.

Maninona moa no io sokajy taona io no ferana ho an'ity sampana zokiny indrindra ity ?

"Tsindranolahy an-keniheny ka ny tama-miray ihany no miray". Izany hoe : ireo mitovy foto-pisainana, mitovy hetaheta amam-pilana ihany no miaraka.

Ny fokonolona no sehatra hifanabeazan'ireo tanora ireo. Ny mampiavaka ny fokonolona dia ilay fiaraha-monina " anjakan'ny teny ierana ". Ny tanora miditra ao amin'ny fokonolona dia tafiditra ho isan'ny fianakaviamben'ny skotisma eran-tany.

Ao amin'ny fokonolona , ny mpiandalana dia afaka misafidy malalaka izay lahasa mifanaraka amin'ny filany toy ny : vadibainga, asa tanana,....ary ny mpiandraikitra dia miara-manomana sy mandanjalanja izay rehetra atao amin'ny sehatra samihafa. Na any amin'ny fivoriana, na an-tsaha na an-dasy dia tsy maintsy


mahaliana sy mahafinaritra hatrany araka ny filan'ny tanora ny fiaraha- miaina ao amin'ny fokonolona.

Ny fiangavian'i BP an'ireo mpiandalana dia ny hifampitondran'izy ireo toy ny mpirahalaha, mpiraitampo mifampizara ny manta sy ny masaka. Ny mahampinamana ny tompon'andraikitry ny fokonolona sy ny mpiandalana dia mitaky fitoviam-pijery momba ny marina sy ny rariny mba hampaharitra ny fiarahana ankehitriny sy hitsinjovana ny ho avy.

NY FOMBA FANABEAZANA ANTILY

Miompana amin'ny lohahevitra fito ny fomba fanabeazana antily. Tsy maintsy ampiasaina miaraka avokoa izy rehetra. Tsy misy omen-danja kokoa na iray aza fa mitovy lenta izy rehetra. Natao ho fitaovana hampiasain'ny mpiandraikitra eo amin'ny fanatontosana ny asany izy ireo :

- Ny fanabeazana amin'ny alalan'ny lahasa.
- Fifandraisan'ny Mpanabe sy Beazina.
- Ny fiainana ankalamanjana.
- Ny tontolon'ny nofy sy ny eritreritra.
- Ny Lalàna sy Velirano.
- Ny fiainana an-tarika.
- Ny Fisondrotana isam-batan'olona.



1-Ny fomba fanabeazana amin'ny alalan'ny lahasa

"Ny fiainana no fianarana mahomby indrindra". Mianatra miaina ny ankizy sy tanora ao anaty skotisma. Manao izay hivoarana sy hahazoana fy eo amin'ny fiainana izy. Miezaka ho tompon'andraikitry ny fiainany mba hahaleotena sy hahay hiray hina.

Mandray fianarana avy amin'ny fiainana ny mpiandalana, izany hoe : mahay manatsoaka fahendrena avy amin'izay zava-mitranga. Tsy ho mpitan-damba ny mpiandalana, fa hiezaka hirotsaka hatrany eo amin'ny fiaraha-monina misy azy. Ny vadibainga fa indrindra ny asa fampivoarana iombonana ataon'ny fileovana na ny fokonolona no mampivelatra ny fahaizana amam-pahalalan'ny tanora beazina ato amin'ny Mpiandalana. Lahasa tonga dia vavany ahafahan'ny Mpiandalana mihetsika sy manao zavatra ireny fa tsy kabary na tsianjery fotsiny ihany.

"Kendren'ny Mpiandraikitra mba hahasahana ny lafim-piainana rehetra ny lahasa ataon'ny fokonolona".

Ny vadibainga

Vadibainga no iantsoana ny lahasa ataon'ny Mpiandalana.

Ny vadibainga dia fitambarana lahasa manana lohahevitra iombonana.

Mba handeha araka ny tokony ho izy ny vadibainga dia iarahana manapaka ao amin'ny fokonolona ny lohahevitra raisina. Toy izao no fomba enti-manomana vadibainga.

Volavolan'ny tetik'asa isam-pileovana

Miainga avy amin'ny fanadihadiana na fivoriana nataon'ny fileovana no hamantarana ny filàn'ny zatovo. Aorian'izay dia miezaka ny fileovana hamaritra tetik'asa na lahasa ka mety ho:

- lahasa enti-mampivoatra ny tenan' ny tsirairay : fianarana asa , fikatrohana taranjam-panatanjahantena, ...
- lahasa iaraha-manao amin'ny fileovana : fanadihadiana tontolo iainana, fitsidihana toerana, ...
- lahasa fampivoarana ny fiaraha-monina : fambolena-kazo, fanentanana momba ny fahasalamana, ...

Mipoitra ny hevitra, mandray anjara sy mikaroka ny rehetra. Izay tena mahasarika ny zatovo be indrindra no asongadina amin'ny ady hevitra. Tarihana hifantoka amin'ny hevitra iray, lahasa iray, tetik'asa iray ny rehetra. Samy manana ny tetik'asany avy ny fileovana.

Misy fotoana handravonana ireo amin'ny Diniky ny Fokonolona.

Anjaran'ny mpiandraikitra ny:

- Manamarina raha samy manana tetik'asa daholo ny fileovana.
- Manome hevitra ny loholona hanampiana azy hisafidy izay ho tetik'asany.
- Manasongadina amin'ny fotoana maha-mety azy ny hevitra mivoaka.
- Manara-maso ny fivoaran'ny volovolan-dahasa.

Fisafidianana ny vadibainga eo amin'ny fivorian'ny fokonolona

Mivory daholo ny Fokonolona miaraka amin'ny mpiandraikitra. Samy mampiseho ny heviny sy ny volavola tetik'asany ny fileovana tsirairay. Raha tsy misy hevitra ifanarahana, dia anjaran'ny mpiandraikitra ny manao izay hipoiran'ny singa mahasrika tao amin'ny volavolan-tetik'asa rehetra ao amin'ny tetik'asa iray vaovao. Ny zava-dehibe dia ny handrisika ny zatovo rehetra hanao ilay vadibainga. Tsy ilaina mihitsy ny tsangan-tanana na fifidianana fa mampizarazara ireny.

Fandrafetana vadibainga eo anivon'ny diniky ny mpiandraikitra

Mivory miaraka ny mpiandraikitra sy ny Loholona. Eo no fotoana hanaovana ny fandaminana. Faritana ny dingana, ny asa ataon'ny isam-pileovana. Samy miverina any amin'ny Fileovana ireo Loholona hilaza izay tapaka. Raha mitaky teknika ilay "Vadibainga" dia tsy maintsy atao izay fomba ianarana izany. Io fandaminana io dia mbola tohizina amin'ny fivoriana hafa.

Lahasa isam-pileovana vokatry ny vadibainga voafidy

Raha vao voafaritana ny zara asa ataon'ny isam-pileovana dia mivory ny mpiray fileovana ary manomana ny lahasa. Mahaleo tena izy ireo amin'izany. Andraikitra ny mpiandraikitra kosa ny:

- Mitazana azy tsindraindray indrindra raha miantsaha ny fileovana fa tsy tokony ho tsapa ny maha-eo azy ka hanelingelina.
- Mijery raha samy manana anjara andraikitra mahaliana azy ny mpiandalana tsirairay.

Diniky ny mpiandraikitra hijerena ny zava-misy

Ilaina ny fanarahana mitohy ny zava-misy mandritra ny tetik'asa. Aorian'ny Diniky ny Fokonolona nanapahana izay vadibainga hatao, dia mivory ny mpiandraikitra mba :

- Hanombana ny fiantraikan'ny vadibainga amin'ny fomba fanabeazana
- Hanombana ny fiantraikan'ny vadibainga eo amin'ny fivoaran'ny mpiandalana amin'ny ankapobeny
- Hamantatra ireo fahasahiranana lehibe mety hanembantsembana ny fizotran'ny vadibainga
- Hikaroka ny fitaovana sy ny hoenti-manana
- Hampiditra ao amin'ny vadibainga ireo soa toavina amin'ny maha-olona sy maha-kristianina
- Hijery ny lafiny rehetra hampivelarana ny mpiandalana

Atao ny diniky ny mpiandraikitra isaky ny dingana amin'ny vadibainga, fa eo no fotoana :

- Hanombanana sy hijerena ny fomba fiasan'ny fileovana
- Handraisana fepetra amin'ny tsy fahombiazana madinika mety hanakantsakana
- Hijerena ny fison-drotana isam-batan'olona sy ny seha-pibeazana irosoany amin'ny dingana manaraka
- Hanombanana ny asa mba hanitsiana na hanohizana izay vita.

Lanonana farany ho fankalazana ny ezaka vita

Teo ireo fahasahiranana isan-karazany nefa dia samy nikiry ny rehetra hanao izay hampahomby ny vadibainga. Koa rariny raha ankasitrahana ny ezaka vita, hampahery ny mpiandalana hanao tsaratsara kokoa, sy hahatsapany fa nahavita sy mahay zavatra izy. Ilain'ny mpiandalana koa ny mahazo fahafinaretana avy amin'ny zava-bitany sy ny miala voly aorian'ny ezaka nataony. Koa atao ny lanonana hanombanana ny vadibainga sy ireo zava-niseho nandritra ny lahasa. Arakaraka ny tetik'asa, ny antony, ny fotoana ary ny mpandray anjara , no andrindrana ny lanonana .

Vadibainga sy fampivoarana iombonana

Raha nisafidy ny hanao vadibainga ao amin'ny fiaraha-monina hoenti-mampivoatra azy ny fokonolona na fileovana dia izay no antsoina hoe : fampivoarana fiarahamonina.

Misy endrika telo no fisehony :

- asa fanasoavana iombonana : manatanteraka asa hoenti-manasoa ny fiaraha-monina ny mpiandalana (fambolen-kazo ataon'ny fokonolona mpiandalana samirery ohatra)
- asa fampivoarana iombonana : miara-manatanteraka amin'ireo olona hahazo tombontsoa amin'ny zavatra ataony ny mpiandalana (fanaovana aro-afo

- miaraka amin'ny fokonolona, hisorohana ny doro tanety ohatra)
- fanabeazana ho amin'ny fampivoarana : manatanteraka asa mitsinjo lavitra kokoa sy mivelatra amin' izao tontolo izao ny mpiandalana (tetik'asa fitandroana ala mba hahafahan'ny manana aina rehetra hivelona, hahatonga ny rivotra hadio, ny orana ho avy ohatra)

Ny fampivoarana iombonana no vadibainga mahafeno ireo fepetra takian'ny seha-pibeazana ikatrohan'ny mpiandalana :

- ao no ahafahany mifanerasera amin'ny hafa sy mihevitra ny hafa
- ao no anovozany ireo teknika sy hairaha takian'ny fanatanterahana ilay vadibainga
- ao no iadiany amin'ny fitiavan-tena sy ikatsahany tombon-tsoa iombonana
- ao no ahazoany fahalalana vaovao
- ao koa no ahafahany miaina ireo soa toavina amin'ny maha-olona sy mahampanara-dia an'i Kristy azy.

2- Fifandraisan'ny beazina sy mpanabe

Firohotan'ny zatovo ny skotisma, fa manana anjara asa lehibe ao koa ny olon-dehibe :

- Mila olon-dehibe hilan-kevitra sy hifampiresahana ny tanora.
- Mahatanora lalandava ny olon-dehibe ny fifaneraserana amin'ny tanora.
- Tsy miady laharana izy ireo amin'izany fa mipetraka amin'ny toerana misy azy avy, izany hoe : ny olon-dehibe tsy hifanahin-jaza ary ny zatovo tsy hiseho avy hatrany fa mahavita ny ataon'ny olon-dehibe.
- Fantatry ny zatovo fa azony antenaina hihaino sy hiara-dalana aminy hatrany ny mpiandraikitra satria zoky mahatoky.
- Tsy mandeha ho azy ny fomba ampiasain'ny skotisma amin'ny fanabeazana imasoany ary tsy ataotao foana, fa mila olon-dehibe hampiasa azy araka ny tokony ho izy.
- Tsy misy fanabeazana azo atao, raha tsy mifandray tsara ny tanora sy ny olon-dehibe. Tsy fifandraisana mifintina sy mikarainkona anefa no ato amin'ny Skotisma fa fifandraisana mampivoatra sy mampivelatra.
- Ny mpiandraikitra fokonolona dia tena olon-dehibe, manana sy mitana ny maha- izy aza anefa koa mahay miaraka tanteraka amin'ny zatovo sy ny tanora.

OLON-DEHIBE

MIARAKA amin'ny zatovo sy ny tanora : miara-dalana aminy, miezaka ny hahafantatra azy sy ny hifankahazo aminy, mahay mihaino azy, mamantatra ny hetahetany sy ny nofinofiny ...

MANAMPY ny zatovo sy ny tanora raha sendra ny sarotra izy, raha mitady ho solafaka, hahombiazany amin'izay ataony.

MIEZAKA MANORO SY MAMPAHAFANTATRA ny zatovo tsirairay ny amin'ny tenany, ny hevi-dalin'ny zava-niainany ao amin'ny fokonolona.

Raha fintinina dia ZOKY, niara-mamindra amin'ny zatovo ny mpiandraikitra. Miseho indrindra izany eo amin'ny fandaminana eo amin'ny fokonolona.

Fandaminana ao amin'ny Fokonolona

Ny mpitarika ny fokonolona dia

Ny Mpiandraikitra fokonolona

Ny Mpanampy Mpiandraikitra fokonolona

Ny Ray am-panahy na / sy Zoky am-panahy.

Ny mpitarika dia "fileovana" iray izay manana ny Mpiandraikitra fokonolona ho filohany ka ny fihaonana izay tsy maintsy ataony matetika dia antsoina hoe : Diniky ny mpiandraikitra.

Andraikitra ny Mpiandraikitra fokonolona

Miantoka ny fahombiazana sy ny fampandrosoana ny Fokonolona
Mitantana ny Fokonolona
Mizara andraikitra sahaza ny mpanampy tsirairay ary manampy azy eo amin'ny fanatanterahana izany
Manomana sy mitarika ny filan-kevitra
Miandraikitra ny fison-drotan'ny 2/3 ny mpiandalana amin'ny dingana omaniny

Noho izany : olona tsara ofana no atao Mpiandraikitra (nahavita lasy Salohim-bary raha azo atao), olona matotra ary afaka hisahana tsara ny andraikiny, modely eo amin'ny fiainana kristianina ka vita mariazy raha manambady, ary tsy mpikatroka mafana fo amin'ny politika.

Andraikitra ny Mpanampy Mpiandraikitra

Manome ny heviny eo amin'ny Filan-kevitra ny mpiandraikitra.
Manaiky ary mitady mandrakariva toro hevitra sy fanitsiana avy amin'ny Mpiandraikitra .
Miandraikitra ny fison-drotan'ny 1/3 ny Mpiandalana amin'ny dingana omaniny.
Miofana mba ho tonga mpiandraikitra.

Filan-kevitra

Ilaina ny filan-kevitra na ho an'ny fileovana na ho an'ny Fokonolona mba hampandeha sy hampahomby tsara ny fanabeazana. Fampanjakana ny hevitr'olon-tokana ny tsy fanaovana filan-kevitra ka mifanohitra amin'ny "teny ierana ". Antsoina hoe : DINIKA ny filan-kevitra ato amin'ny Sampana Mpiandalana.

. Diniky ny fokonolona

Ny Mpiandraikitra sy ny Mpanampy azy miaraka amin'ny Loholona sy ny Mpanampy azy isam-pileovana no mandray anjara amin'ny diniky ny Fokonolona.

Ny diniky ny Fokonolona dia natao indrindra :

- hanapahan-kevitra mikasika ny lahasa iombonan'ny Fokonolona.
- handaminana ny lahasa hotanterahina sy hijerena ireo singa rehetra ilaina amin'izany.

- hitsinjarana andraikitra ho an'ny tsirairay sy isam-pileovana.
- hanombanana ny fanomanana, ny fizotran'ny asa ary ny vokany mba hanitsiana ny manaraka sy hivoarana.

Atao indray mandeha isam-bolana.

Atao matetika araka izay tratra raha hanao vadibainga .

. Diniky ny Mpiandraikitra

Ny Mpiandraikitra sy ny Mpanampy miaraka amin'ny Ray am-panahy (RAP), na ny Zoky am-panahy (ZAP) no manatrika ny Diniky ny Mpiandraikitra.

- Manara-maso ny lahasan'ny fileovana tsirairay.
- Manara-maso ny fandrosoan'ny Mpiandalana eo amin'ny fanatanterahana ny seha-pibeazana nofidiany.
- Manomana ny lahasa hotanterahin'ny Fokonolona.

3- Ny fiainana an-kalamanjana

Eny ankalamanjana, eo anivon'ny zavaboary dia sehatra manana ny lanjany manokana hanatanterahana ny lahasa Antily.

Ao izy no afaka mamantatra ny heriny sy ny halemeny rehefa misetra ny herin'ny natora dia : ny rivotra sy ny hatsiaka, ny hafanana sy ny masoandro na andro na alina.

Ao izy no mamantatra ny fifampiankinan'ny hery rehetra : na ny manana aina, na ny zava-maniry, na ny ety an-tany, na ny eny ana habakabaka, ...

Ao izy no mibanjina ny asa tanan'Andriamanitra ka mampitodika azy any amin'ilay Mpahary azy.

Amin'izany izy dia afaka manaja sy miaro ny zavaboary satria tsapany fa miantoka ny ainy ireo.

Ny fanajana sy ny fiarovana ny zava-boaary voalohany ho an'ny Antily, dia ny fahaizana miaina eny anivon'ny natora sy mamolaka azy any amin'ny lasy sy ny an-tsaha.

Ny an-tsaha sy ny lasy no enti-mampihatra ny "ankalamanjana", fomba fanabeazana mifameno amin'ireo singa hafa. Manana endrika manokana kosa izy ireo ato amin'ny Mpiandalana satria :

Ny fitiavana ny fiainana ankalamanjana dia :

- Hampirindra ny fikolokoloana ny vatana, ny saina ary ny fanahy.
- Hanala ny hakamoana sy ny mandeha ho azy.
- Hifehazan-tena amin'ny filàna rehetra.
- Hahazoana mifandray bebe kokoa sy mifankahalala misimisy kokoa amin'ny :
 - Olona sy ny asa ataony.
 - Zava-boary (hazo, biby, sy ny sisa...)
- Hahazoana miaina ny lalàna

An-tsaha

Mizara roa : Iray andro (24 ora)

Faran-kerinandro (48 ora)

Afaka manao azy avokoa na ny fileovana na ny fokonolona. Tokony hanao an-tsaha iray (1) isam-bolana ny fileovana ary in-droa (2) isan-telo volana ny fokonolona.

Tsy maintsy mahazo lalana avy amin'ny tonia vao mandeha ary farafaharatsiny Mpiandraikitra vita tsiry no mitarika izany.

Lasy

Enina andro raha kely indrindra ary 10 andro raha be indrindra no faharetan'ny lasy Mpiandalana, ahafahana mivelona ny tarigetran'ny lalàna rehetra.

Ny Fokonolona iray manontolo no miaraka, ka amin'ny fotoana mahafaka ny maro no tsara anaovana azy (fialantsasatry ny mpianatra).

Ireo Mpiandalana miasa dia tokony hanomana ny "congé" mialoha.

Tsy maintsy olona nahaloha vatom-panorenana no mandeha amin'izany.

Nahavita ny fizaham-pahasalamana ara-dalàna.

Tsy maintsy mahazo lalana avy amin'ny Tonia sy Faritra na Diosezy araka ny tolo-kevitra ny Filohan-tsampana.

Mpiandraikitra nahavita lasy ketsa farafahakeliny no mahazo mitarika raha tsy izany mitady mpiahy mahafeno ny fepetra.

Tsy voafetra ny halavirana fa arakaraka ny karazan'ilay lasy atao.

Misy karazany roa ny Lasy :

- Lasy mifindrafindra (camp volant) : fanadihadiana no tena vontoatiny
- Lasy miorina (camp fixe) : hanatanterahana indrindra ireo vadibainga na asa fampivoarana iombonana ka atao indray mandeha isan-taona.

Tadidio fa fepetra ahombiazan'ny lasy ny fiofanana azon'ny mpitarika ny lasy.

Ny vondron-dasy

Ny vondron-dasy dia lasy iarahan'ny fokonolona maromaro. Ka ny samy mpiandraikitra no miara-mitantana na ny filohan-tsampana Mpiandalana eo amin'ny faritra na Diosezy.

- Atao ny vondron-dasy raha mbola tsy ampy fiofanana ny mpiandraikitra satria afaka mifanohana na tohanan'ny filohan'ny sampana izy.
- Atao koa ny vondron-dasy raha misy «vadibainga» lehibe ilàna zatovo maro hanatanteraka izany, asa fampivoarana iombonana mila tana-marô.
- Samy manana ny fandaharam-potoana manokana ho azy ny Fokonolona tsirairay ao amin'ny vondron-dasy.
- Ny Mpiandraikitra Fokonolona no tompon'andraikitra ny fokonolony sy mitarika ny lahasa rehetra atao ao. Manara-maso fotsiny ihany ny filohan'ny lasy (filohan-tsampana na mpiandraikitra za-draharaha).

- Misy fotoana voatokana, hiarahan'ny mpiray vondron-dasy fa ankoatra izany, dia samy miaina any amin'ny fileovany sy ny fokonolony avy ny mpilasy.
- Misy koa fotoana araraotina hanofanana ireo mpiandraikitra fokonolona miaraka mitarika lasy.
- Tsy azo ampiarahana mihitsy ny sampana samy hafa fa tsy maintsy hajaina ny fahaleovantenan'ny sampana.

Ny filan-kevitra any an-dasy.

Isan-kariva dia tsy maintsy misy :

- Diniky ny fileovana : ny fileovana tsirairay no milaza ny heviny momba ny fizotran'ny lasy any amin'ny zorony
- Diniky ny mpiandraikitra : ny mpitarika ny lasy rehetra no manombana ny andro vao avy nodiavina sy mandamina ny manaraka.
- Samy manao azy any amin'ny toerana misy azy avy amin'ny fotoana iray ireo aorian'izay vao atao ny diniky ny lasy.

Raha mitsidika ny lasy ny RAP na ny ZAP dia tokony handray anjara amin'ny diniky ny MPIandraikitra satria tadidio fa ny fotoana tena ilana ny RAP na ZAP any an-dasy dia ny filan-kevitra. Ao izy no afaka miara-manombana ny fizotran'ny lasy sy manome ny heviny amin'ny maha-ray am-panahy azy.



4- Tontolon'ny nofy sy eritreritra

Misy ny fiainana mahazatra isan'andro toa mamefy ny saina tsy hika-roka zavatra hafa intsony. Ny Skotisma kosa mampisokatra ny maso sy ny saina amin'ny tontolo hafa, tsy dia lavitra akory, fa takatry ny eritreritra ihany :

Ohatra : raha ampidirina ao amin'ny tontolon'ny fiaraha-monina ny zatovo toy ny fifidianana ben'ny tanana, na ny tolona nataon'ny menalamba dia mahazo loko hafa ny lahasa mahazatra.

Ny tolona tamin'ny fanjanahan-tany dia hamantaran'ny zatovo fihetseham-po vaovao mandrisika azy hiezaka hisetra ny mafy hanaporofa-na ny fitiavan-tanindrazana raha handokoana vadibainga iray.

Izany no tontolon'ny nofinofy sy ny eritreritra tsy maintsy handokoan'ny mpiandraikitra ny vadibainga, lahasa mpiandalana izay hisantaran'ireo zatovo sahad-y ny fiainana.

Raha ato amin'ny sampana Mpiandalana dia "ny lalana" aloha no manome azy izany tontolon'ny nofy sy eritreritra izany.

"Ny lalana" tokoa manko tonga any amin'ny toerana aleha rehetra. Ny lalana tsy mamadika. Ny lalana no ifaneraserana fa sady tsimialonjafy no tsy manavakavaka.

Ao amin'ny vaovao Mahafaly no amantarana ny lalana. Fa hoy i Kristy : "Izaho no lalana sy fahamarinana ary fiainana; tsy misy olona mankany amin'ny Ray afa-tsy amin'ny alalako". (Jo,14,6)

Ao ny lalana malalaka sy migodana ahatsiarovana ny tsiron'ny fiainana.

Ao ny lalan-kely tery sy sarotra mitaky fahaizana sy hakingana.

Ao ny lalana miolikolika sy mideza, mila herim-po, sarin'ny fiainana miandry ny mpiandalana aorian' ny " lalana".

Eny amin'ny lalana, tanàna, vohitra sy ny fiaraha-monina eny no ifaneraseran'ny mpiandalana ka ifampizarany amin'ny hafa.

Ny lahasan'ny mpiandalana izany dia mitodika indrindra amin'ny fiaraha-monina sy ny mpiara-belona ka ifaneraserany amin'ny hafa, hiarahany mamindra sy hifampizarany aminy.

Ny Mpiandalana dia tanora mirotsaka hika-roka sy hamakivaky ny fiainana, vonona hamadi-bainga.

Manompo ny firenana sy ny fiangonana ary ny manodidina izy. Miezaka ny handroso ho tsaratsara kokoa hatrany. Mahay mifampizara amin'ny hafa sy mahay mandray izay tsara avy aminy koa.

Ny anarana entin'ny fileovana sy ny fokonolona

Anaran'olona malaza efa maty no fidiana ho an'ny fokonolona. Ny toetra tsara sy ny zava-tsoa vitany no raisina ho fenitra sy atao filamatra ary redonina amin'ny hiaka. Tsy ny rima no zava-dehibe amin'ny hiaka fa ny hevitra.

TENY BAIKO : "Andry iankinana vonona tsara
Mpiandalana mifampizara".

NY FANEVAN'NY FILEOVANA

Sarin'ilay atao filamatra atao amin'ny tapa-damba mahitsizoro

Ohatra: RALAIMONGO

Samy misafidy ny loko araka izay itiavany azy nefa atao misy dikany mazava. Ny lokon'ny tokotaniny dia misy telo azo isafidianana : fotsy, orange ary mena. Ny sisiny kosa dia loko hafa araka izay tian'ny enina mirahalaky.

5- Fiainana an-tarika

Fiarahan'ny zatovo mitovitovy taona, hizàrany mandray sy mitàna andraikitra ary hiofanany ho mahatsangy no àry, mba hanefy indrindra ny toetrany tsy ho very mandeha na an-tsaha na an-tànana, ny hitokisany ny tenany, ny handalàny ny soa iombonana, ny hahazany miara-monina sy miara-miasa na hitarika olona, izany no kendren'ny fiainana an-tarika.

Hery manentana ny zatovo ny fiarahany amin'ny namany vitsivitsy. Antsoina hoe "fileovana" ny tarika izay itambaran'ny zatovo enina farafahabetsany. Fileovana telo no mamorona tafika atao hoe "Fokonolona" ato amin'ny mpiandalana.

- Ao amin'ny fileovana no màmantatra ny tenany sy ny fahafahany mifandray amin'ny hafa ny mpiandalana.
- Ao izy no misedra ny fahaleovan-tenany sy ny fahaizany miray hina.
- Ao izy no miombom-pifaliana sy misetra ireo adiady amam-pahasahiranana.
- Ny mpiandraikitra dia mamela ny fileovana ho sehatra ahafahan'ny zatovo mandray anjara amin'ny fiainan'ny fokonolona sy manapa-kevitra.

Sekoly ianarana mandray andraikitra ny Fileovana, noho izany dia tsinjaraina ho an'ny Mpikambana rehetra ny andraikitra ao aminy ary ovaovana isan-taona. Ampifandraisina amin'ireo seha-pibeazana ikatrohan'ny beazina ny andraikitra omena azy. Ireto misy andraikitra azo omena :

Loholona (LH)
Mpanampy Loholona (MLH)
Fitantanana (vola).
Fitaovana (boky, vilany, lay,...)
Litorjia.
Lalao...
Lahasa famokarana.

Ny fileovana no mizara ny andraikitra araka ny hetaheta sy ny filàn'ny mpiandalana, araka ny vokatra tiany hotratrarina ary araka ny asa hotanterahana.

Fisafidianana Loholona

Ny Loholona dia ilay mpitarika ny fileovana.

Fidian'ny mpiray fileovana ny Loholona, mitondra ribà mena mitsangana roa amin'ny paosy havia izy rahefa vita fanasinana. Ny mpanampy azy kosa mitondra

ribà mena iray eo amin'ny paosy havia rahefa vita fanasinana.

Fivorian'ny Fileovana

Ny dinika dia mitondra aina vaovao mamelombelona ny fikambanana ka tokony hatao matetika. Natao hifaneraseran'ireo Mpiandalana sy ny mpiray fileovana izay tokony hifankahita araka izay tratra izy : intelo isam-bolana raha kely indrindra.

Ny fivoriana dia tsy "teny midina" fa "teny ierana" ka tompon'andraikitra avokoa ny mpivory rehetrà fa tsy ny loholom-pileovana na ny Mpiandraikitra Fokonolona fotsiny ihany.

Ny diniky ny fileovana dia natao hanomanana ny lahasa na vadibainga.

SAMPANA	MPIANDALANA
ANARANA SY ISAN'NY TARIKA	FILEOVANA (6)
TAFIKA	FOKONOLONA (6 x 3)
FIZARANA ANDRAIKITRA : - Miovaova - Mifandray amin'ireo seha-pibeazana ikatrohan'ny beazina afa-tsy ny Loholona sy ny Mpanampy Loholona	- Loholona (LH) - Mpanampy Loholona (MLH) - Mpitahiry vola sy fananana - Mpitantsoratra - Mpanentana - Fahasalamana.
FISAFIDIANANA LOHA TARIKA	Fidin'ny Mpiray Fileovana ny Loholona sy ny Mpanampy Loholona Fepetra : - Ampy fiofanana hitondra ny fileovana. - Vita BATEMY SY KOMONIO
FIVORIAN'NY TARIKA	Diniky ny fileovana : - hanapahan-kevitra momba ny fiainan'ny fokonolona - hanomanana ny programa sy ny lahasa ataon'ny fileovana
FIVORIAN'NY TAFIKA	Fivorian'ny fokonolona : - hanapahan-kevitra mikasika ny lahasa hatao - fizarana andraikitra - hanaovana toman'ezaka
FILAN-KEVITRY NY TAFIKA	Diniky ny fokonolona : Mpiandraikitra - LH - MLH no manatrika azy
FILAN-KEVITRY NY MPIANDRAIKITRA	Diniky ny mpiandraikitra : Mpiandraikitra, RAP na/sy ZAP - hanomanana lahasa - hijerena ny FIBO

6- Lalàna sy velirano

Isaky ny misy olona maromaro miara-miaina dia tsy maintsy mila fifampifehezana hahamora ny fifandraisana : ny lalàna no ifampifehezan'ny mpiandalana.

Manana idealy tiany hotratrariny ny mpiandalana mba hampitombo hasina ny tenany sy hitantanany ny fiainany : hitany ao amin'ny lalàna izany ary ankatoaviny amin'ny velirano.

Noho izany ny mpiandraikitra dia tokony hampiasa ny lalàna sy ny velirano hanabeazana ny mpiandalana mba hifanajany sy hanajany ny teny omena ary indrindra hananany idealim-piainana.

Ilain'ny mpiandalana ny mahay tsianjery ny lalàna sy ny velirano fa indrindra ny mitadidy azy lalandava eo amin'ny fiainany sy amin'izay rehetra ataony.

Asongadina ny fotoana anaovana ny velirano satria eo no ilazan'ny zatovo fa azony ny zava-kendren'ny Antily ka vonona hanaraka izany izy.

Ny velirano no fomba idiran'ny zatovo ho isan'ny fikambanana ary omanina ao anatin'ny 3 na 4 volana raha be indrindra.

Ny lalàna

Mampahatsiaro ny adidin'ny mpiandalana amin'ny :

- tenany
- Andriamanitra sy ny Eglizy
- ny manodidina sy ny fiaraha-monina ary ny tanindrazana

Natao hampahery ny fo sy ny saina manoloana ny ady atrehina eo amin'ny fiainana.

Natao ihany koa hikoloana ny vatana sy ny zava-boaary ka hifehezana ny fo tsy ho mora sendaotra amin'ny tsy antony ary handray am-pitsikiana sy am-pitiavana ny zava-miseho rehetra.

Natao indrindra hahaza-miara-miaina amin'ny hafa.

LALANA

- 1- Ny mendrika itokisana no hasin'ny Mpiandalana.
- 2- Miray hina ary tsy mivadika amin'ny Tanindrazany, amin'ny Ray aman-dreniny, amin'ny lehibeny ary amin'ny olom-peheziny ny Mpiandalana.
- 3- Natao hanompo sy hamonjy ny namany ny Mpiandalana.
- 4- Havan'ny olon-drehetra ary mpirahalaha daholo ny Mpiandalana.
- 5- Mahalala fomba sy mitandro ny hajany ny Mpiandalana.
- 6- Tia sy mankafy ny zava-boaarin'Andriamanitra ny Mpiandalana.
- 7- Manaiky avy hatrany ary mandavorary ny ataony rehetra ny Mpiandalana.
- 8- Mahatsindry fo sy mahafehy tena ka mitsiky sy mirana raha sendra ny sarotra ny Mpiandalana.
- 9- Mahay mitsitsy sy mitandrana ary manaja zavatr'olona ny Mpiandalana.
- 10- Madio fiteny, madio fihevitra, madio fitondran-tena ny Mpiandalana.

Velirano

« Miankina amin'ny fahasoavan'Andriamanitra aho ary manome toky ka ny hasin'ny tenako no ataoko antoka fa : HANOMPO AN'ANDRIAMANITRA SY NY EGLIZY ARY NY TANINDRAZAKO ARAKA IZAY TRATRY NY AIKO. HANAMPY NY NAMAKO HATRAIZA HATRAIZA ARY HAMPIVOATRA NY FIAINAKO HO TSARATSARA KOKOA HATRANY. HIVELONA NY LALAN'NY ANTILY MPIANDALANA.».

Alohan'ny andro hanaovana na handraisana ny velirano dia tsy azo hadinoina ireto fomba ireto : fitanan-kaja, ari-tory.

Ny fitanan-kaja

Ny fitanan-kaja no fomba iray ahafahana manombana ny fiainan'ny mpiandalana.

Manana endrika telo ny fitanan-kaja :

Fitanan-kaja famaizana

Atao io rahā voatohintohana ny hajan'ny fikambanana ka mahazo henatra noho ny nataon'ny mpikambana : Mpiandalana, na fileovana na fokonolona. Tsy maintsy atao eo anatrehan'ireo olona niharan'ny tsy mety ka nahafa-baraka. Vavolombelona izy ireo. Mahazo milaza ny heviny koa ny miakatra fitanan-kaja.

Fitanan-kaja fandraisana

Zava-dehibe loatra ireo Fisondrotana isam-batan'olona (FIBO) rehetra ato amin'ny sampana Mpiandalana koa tsy maintsy mandalo fitanan-kaja avokoa. Manampy ny tanora handini-tena sy hamantatra ny dingana irosoany izany.

Eto no manapaka ny mpiandalana sy ny mpiandraikitra na horaisina izy na mila manao ezaka na tena tsy horaisina fa miandry.

Fitanan-kaja fankaherezana miendrika fankalazana

- Aorian'ny zava-dehibe vitan'ny mpiandalana na fileovana na fokonolona teo amin'ny fiainana (mariazy, fahafaham-panadinana, famonjena olona tra-doza, ...) dia ankalaizaina ampahibemaso izy.
- Aorian'ny lasy : lazaina amin'ny mpilasy tsirairay ny mety sy ny tsy mety rehetra nataony nandritra ny fotoana nilasiāna dia omena toro hevitra izy.

Ahoana ny fomba hanatanterahana izany?

Isaky ny hanao fitanan-kaja dia lazaina ny toerana, ny fotoana, ny mpitarika ny fotoana ary ny mpanatrika sy ny fomba manavaka.

- + Efa voaomana ara-dalàna daholo ny zavatra lazaina amin'ireo olona hiakatra fitanan-kaja.
- + Tokony ho hentitra amin'izay fanapahan-kevitra ny mpitarika ny fitanan-kaja
- + Tanana an-tsoratra daholo izay voalaza rehetra mandritra ny fitanan-kaja ary tahirizina amin'ny fitadidian'ny fileovana na fokonolona.
- + Tazonina ho tsiambaratelo ny teny rehetra nifanaovana tao.

Inona avy ireo fitaovana ilaina amin'ny fitanan-kaja?

Fomba iorenan'ny fahombiazana ny fitanan-kaja ato amin'ny mpiandalana; zavatra manana ny hasiny sy ny lanjany tokoa ka ilaina ny hanaovana azy amin'ny fomba manetriketrika.

- Ny fanevam-pokonolona eo mandrakariva
- Sainam-pirenena
- Lakroa
- Labozia
- Baiboly
- Toerana madio
- Cahier handraisana ny fizotran'ny fitanan-kaja, tsy maintsy manao tatitra amin'ny ambaratonga avy.

Ari-tory

Ny mpiandalana, alohan'ny hiadiany amin'ireo fakam-panahy mety hisakana azy tsy anatanterahany ny veliranony, na izay zavatra hafa heveriny fa lehibe sy masina aminy, dia manao aritory hifankaherezany miaraka amin'ireo namany sy Ray amandreniny. Tsy maintsy misy aritory mialoha ny velirano.

7- Fisondrotana isam-batan'olona

Sehatra ahafahan'ny mpiandalana tsirairay mivoatra ny fileovana sy ny fokonolona. Manoritra seha-pibeazana ny Antily ary mamaritra ireo vokatra hotratrarina ara-panabeazana amin'izany. Ny tanora kosa mifidy izay sehatra ivoarany ary miara-manombana amin'ny mpiandraikitra ny lalana vitany.

Ny zava-dehibe amin'ny fisondrotana isam-batan'olona dia ny hahatonga ny tanora tsy ho mora mionona amin'ny kely vitany fa hiezaka ho any amin'ny tsara kokoa hatrany.

Tsy ny hahatongavany any amin'ny tanjona no zava-dehibe fa ny fialana amin'ny toerana nisy azy ho any aloha hatrany.

Marihina hatrany ny dingana vitan'ny Mpiandalana hanomezana hery azy.

Toy izao no firafitry ny "fisondrotana isam-batan'olona" ato amin'ny mpiandalana:

- Misy seha-pibeazana enina (ohatra : Fikatsahana an'Andriamanitra)
- Misy ambaratonga roa isaky ny seha-pibeazana iray (ambaratonga I sy II)
- Misy vokatra hotratrarina hatramin'ny 7 isaky ny ambaratonga iray

Misy dingana 3 ato amin'ny mpiandalana

- Dingana voalohany : MIANA-DALANA
- Dingana faharoa : MIARA-DALANA
- Dingana fahatelo : MPIANDALANA

Fantaro ny hevitr'ireto teny ireto :

Seha-pibeazana

Ny seha-pibeazana dia ireo lafin-javatra ifantohan'ny fanabeazana antily hampivoatra ny maha-olona ao amin'ny ankizy sy zatovo ka ahafahany mandray antanana tsikelikely ny maha-izy azy. Misy enina ny seha-pibeazana antily dia ny fikatsahana an'Andriamanitra, ny fifandraisana amin'ny hafa, ny fahaizana manavia manavanana, ny fikoloana ny vatana, ny fifehezana fihetseham-po ary ny fikolokoloana ny toetra.

Vokatra hotratrarina ara-panabeazana

Ny vokatra hotratrarina ara-panabeazana dia ireo fiovana tokony ho hita sy tsapa eo amin'ny tanora rehefa avy mikatroka seha-pibeazana iray izy.

Lahasa

Ny lahasa dia fitambaran'ny zavatra atao isan-karazany hahatanterahana asa lehibe kokoa, fa indrindra hanatratrarana vokatra ara-panabeazana.

Ny fivoriana, ny an-tsaha, ny lasy dia sehatra hahafahana manatanteraka lahasa.

Ohatra :

- Lahasa atao : fanorenana any an-dasy
- Zavatra atao : manorina toerana fatoriana, fandrahoana, fisakafoanana sy ny sisa
- Fomba hampiasaina hanatanterahana izany : mikapa hazo araka ny tokony ho izy manambatra hazo amin'ny vona sy fomba hafa, mangady...
- Seha-pibeazana ikatrohana : fahaizana manavia manavanana, fikoloana ny vatana ary fifandraisana amin'ny hafa.
- Vokatra hotratrarina ara-panabeazana :
 - * Ao amin'ny seha-pibeazana "fahaizana manavia manavanana": manao fampiharana ireo teknika fantany.
 - * Ao amin'ny seha-pibeazana "fikoloana ny vatana": tia miaina an-kalamanjana ka mivoaka matetika eny anivon'ny zavaboary
 - * Ao amin'ny seha-pibeazana "fifandraisana amin'ny hafa" : mitandro ny tontolo iainana mba hisian'ny fahasalamana sy fitohizan'aina.

FIKATSAHANA AN'ANDRIAMANITRA		
	Ambaratonga I	Ambaratonga II
1.1		
1.2		
2.1		
2.2		

Mahavita **dingana** iray ny Mpiandalana raha mahavita ambaratonga I sy II amin'ny seha-pibeazana roa :

Seha-pibeazana	S1	S2	S3	S4	S5	S6
Ambaratonga I						
Ambaratonga II						

na ambaratonga I sy II amin'ny seha-pibeazana 1 sy Ambaratonga I amin'ny seha-pibeazana 2

Seha-pibeazana	S1	S2	S3	S4	S5	S6
Ambaratonga I						
Ambaratonga II						

na ambaratonga I amin'ny seha-pibeazana efatra :

Seha-pibeazana	S1	S2	S3	S4	S5	S6
Ambaratonga I						
Ambaratonga II						

Amin'ny safidy amin'ny **dingana faharoa** dia tsy maintsy mandalo amin'ireo seha-pibeazana 6 ny mpiandalana

Seha-pibeazana	Dingana I		Dingana II	
	Ambaratonga I	Ambaratonga II	Ambaratonga I	Ambaratonga II
S1				
S2				
S3				
S4				
S5				
S6				

Ny fitohizan'ny dingana telo :

Seha-pibeazana	S1	S2	S3	S4	S5	S6
Ambaratonga I						
Ambaratonga II						

Seha-pibeazana	S1	S2	S3	S4	S5	S6
Ambaratonga I						
Ambaratonga II						

Mpiana-dalana	
Mpiara-dalana	
Mpiandalana	

Nahavita ambaratonga iray ny mpiandalana rahefa nahatratra :
 - ny vokatra hotratrarina rehetra ao amin'io ambaratonga io.

Misy talenta mety ho azo amin'ny fandalinana seha-pibeazana iray efa nahavitana ny ambaratonga roa.

- Tsy afaka manao ny ambaratonga faharoa amin'ny seha-pibeazana iray ny tanora raha tsy mahavita ny ambaratonga voalohany.

Fomba isafidianana ny seha-pibeazana

“Avelao hisafidy izay seha-pibeazana hisondrotany ny tanora”

Amin'ny lahasa manomboka ny taona no amantaran'ny tsirairay ireo seha-pibeazana fidiany hikatrohana.

- Miresaka amin'ny zatovo tsirairay ny mpiandraikitra aorian'ny lahasa lehibe voalohany hiara-kijery aminy izay seha-pibeazana manavanana azy ka hofidiana hikatrohana.
- Ao amin'ny fileovana ny tanora tsirairay no mandrakitra an-tsoratra ny ezaka hataony ao amin'ny sehatra nofidiany rehefa avy nifanakalo hevitra tamin'ny mpiray fileovana taminy.
- Entin'ny Loholona any amin'ny filan-kevitra ny Fokonolona ny safidin'ny mpiray fileovana aminy
- Araka izay seha-pibeazana nofidian'ny tanora izay, no hisafidianan'ny Fileovana izay lahasa hataony mandritra ny iray volana na telo volana
- Araka izay seha-pibeazana nofidian'ny tanora tsirairay izay no anomezana azy andraikitra mandritra ny lahasa
- Ankoatra ny tombana iraisana dia manombana ny ezaka vitany ny tanora ary mandrakitra izany an-tsoratra isaky ny mahavita lahasa iray. Ny mpiandraikitra koa manao toy izany ary mameno ny tondro eo ampelantanany.

Rahefa mahatratra ireo vokatra eo amin'ny seha-pibeazana nofidiany ny tanora dia mihaona amin'ny Mpiandraikitra alohan'ny hanombohany ny dingana manaraka.

Aorian'ny fahavitan'ny velirano dia afaka mikatroka ny dingana miana-dalana ny tanora.

Mahavita dingana iray ny tanora dia antsoina hoe : miana-dalana.

Rehefa mahavita dingana roa izy dia atao hoe : miara-dalana.

Rahefa mahavita ny dingana rehetra izy dia atao hoe : mpiandalana.

Maharitra efatra ka hatramin'ny enim-bolana no anaovana ny dingana iray.

Talenta

Ny talenta dia fandalinana ny seha-pibeazana manavanana na mahaliana ny mpiandalana.

Tsy maintsy mahavita ny ambaratonga roa ao amin'ny seha-pibeazana iray izy, vao mahazo maka talenta amin'ny seha-pibeazana iny.

Aorian'ny miana-dalana dia efa afaka mikatroka avy hatrany ireo talenta tiany ho azo ny tanora raha nahavita ambaratonga roa amin'ny seha-pibeazana iray.

A FIKATSAHANA AN'ANDRIAMANITRA 4		
	AMBARATONGA I	AMBARATONGA II
1	Mitady an' Andriamanitra amin'ny fombany manokana sy miaraka amin'ny hafa ✓	Mikatsaka an' Andriamanitra samy irery sy miaraka amin'ny hafa, amin'ny fifaneraserana amin'ny olombelona sy ny zavaboary
2	Mirehareha amin'ny finoany ka vonona handray ny andraikitra tandrify azy	Miombon-panahy amin'ny foto-pinoana katolika ary miraiki-po amin'ny finoany ka vonona hiantsoroka ny adidy sy andraikitra aterak'izany sy miomana hamaly ny iantsoan' Andriamanitra azy ✓
3	Mahay mifandray amin' Andriamanitra ary mahatsapa ny famindram-pony ✓	Mahatsapa ny fitiavan' Andriamanitra sy ny fomba enti-mifandray aminy
4	Miezaka miaina araka ny soa toavin'ny finoany	Mampifanaraka ny fihetsika andavanandro, ka mampifandray ny finoana amin'ny fiainana manokana, manao asa soa ho an'ny fiaraha-monina ✓
5	Manaja ny finoan'ny hafa ka tsy manabatry azy	Mifanakalo hevitra amin'ny olondrehetra tsy anavahana finoana, ka mitady izay mampiombona ny olombelona rehetra

B FIFANDRAISANA AMIN'NY Hafa 82

	AMBARATONGA I	AMBARATONGA II
1	Mandray andraikitra eo anivon'ny fiaraha-monina am-panajana tanteraka ny zon'ny hafa	Miaina @ fahafahana eo anivon'ny hafa sy mampiasa izany ho fandraisana andraikitra ary miady ho an'ny fitovian-jon'ny rehetra
2	Tan-dalàna sy manaiky fifampifehezana	Manaja ny fahefana mipetraka. Mampiasa ny fahefana am-pelatanana hanompoana ny hafa
3 ✓	Mankato ny fitsipiky ny fiaraha-monina	Afaka milaza ny heviny sy afaka mampivoatra izany
4 ✓	Mahatsapa andraikitra ka tsy manilika amin'ny hafa	Mitondra ny anjara birikiny @ fanombanana ny hasina iombonana maha-tompon' andraikitra eo @ tafika
5	Manaiky sy mankato ny soa toavina ao amin'ny fiaraha-monina	Mandala ny soa toavina sy kolontsaina iombonany amin'ny Malagasy, momba ny mponina ary ny kolon-tsaina
6	Mahatsapa fa ny firaisan-kina eran-tany dia manomboka amin'ny firaisan-kina eo amin'ny manodidiana	Manasongadina ny fiaraha-miasa iraisam-pirenena sy firahalahiana eran-tany ; mifandray amin'ny Firenena hafa sy mifanakalo kolontsaina mba hisian'ny fifankahazoana sy fandriam-pahalemana
7 ✓	Mitandro ny tontolo iainana mba hisian'ny fahasalamana sy fitohizan'ny aina	Miaro ny ain'ny olombelona amin'ny alalan'ny fiarovana ny tontolo iainana

FAMOLAVOLANA TOETRA 53

	AMBARATONGA I	AMBARATONGA II
1	Mahay manombana ny fahaizana amam-pahalalany ahazoany misafidy izay hataony any aoriana	Mahalala tena sy afaka manombana ny fetrany ary afaka mitsikera tena hiarovana ny hasin'ny tena ✓
2	Mametraka vokatra hotratrarina eo amin'ny fiainana ka mitady izay fomba hoenti-manatratra izany	Tompon'andraikitra amin'ny fampivoarana ny tenany ary miezaka hatrany hihoatra ny zava-bita ✓
3	Afaka mifidy izay omeny hasina ka miezaka hiaina izany	Mifantoka amin'ny soa toavina ambaran'ny lalàna sy velirano amin'ny fanorenana ny ho avy
4	Tsy misalasala maneho ety ivelany ny fientanam-panahy ary mampifanaraka ny fihetsiny ✓ amin'izany	Maneho fihetsika mifanaraka amin'ny fiontanam-panahy
5	Mitsiky sy mirana raha sendra ny sarotra ka manovo lesona avy amin'ny tsy fahombiazana	Miatrika ny fiainana amin-kafaliana sy amim-pitiavana.
6	Mahatsapa ny ilana ny hafa amin'ny fivoaran'ny tena ✓	Mahatsiaro ny fiombonana ho tohana amin'ny fivoaran'ny tena sy amin' ny fitsinjovana ny ho avy

FIKOLOKOLOANA NY VATANA SY NY FAHASALAMANA 84

	AMBARATONGA I	AMBARATONGA II
1	Mikajy ny vatana ho salama sy tomady ✓	Tompon'antoky ny fitombon'ny vatana ara-dalàna
2	Mifehy ny fientanana sy ny fampiasan-kery ✓	Mahalala ny fivoaran'ny vatana araka ny tokony ho izy Miaro ny fahasalamana ary mahafantatra ny toe-batan'ny tena
3	Mifidy sy mikatroka fanatanjahan-tena iezahana hovitaina tsaratsara kokoa hatrany	Maneho ny maha-izy azy sy mikolokolo ny fahasalaman'ny vatany sy ny manodidina azy
4	Mikarakara sakafo ara-pahasalamana ✓	Manomana sakafo tsotra sy sahaza
5	Mahay mandamina ny fotoany araka ny vokatra tiana hotratrarina ✓	Mahay mandamina ny fotoanany amin'ireo adidy samihafa sy fialan-tsasatra
6	Tia miaina eny ankalamanjana ka mivoaka matetika eny anivon'ny zavaboary ✓	Tia miaina ankalamanjana ka manao fanatanjahan-tena sy hialana voly eny.

FAHAIZANA MANAVIA MANAVANANA

	AMBARATONGA I	AMBARATONGA II
1	Mahita ny lalan-kizorana	Mpampivelatra ny sainy hahay hanova sy hisetra ny toe-javatra isan-karazany
2	Mampitombo ny fahaizany amam-pahalalany amin'ny fanofanan-tena sy fianarana mitohy hatrany	
3	Manao fampiharana ireo teknika fantany ✓	Mampifandray ny fahalalana azo sy ny fampiharana ireo teknika sy hakingan-tanana
4	Misafidy ny asa ataony araka ny fahaizany sy ny fitiavany	Misafidy ny lalan-kizorany araka ny fahaizany, ny heriny ary ny tombontsoany nefa tsy manamaivana ny safidin'ny hafa.
5	Maneho ny heviny, ny tsapany amin'ny fomba maro eo amin'ny sehatra misy azy amin'ny fotoana mahafinaritra ✓	Manamora ny fifandraisana sy ny fifankahazoana am-po amin'ny olona rehetra
6	Mikaroka hatrany ireo teknika hoenti-manatsara hatrany ny fiainana	Mihevitra ny siansa sy ny teknika ho fitaovana enti-mamantatra sy mampandroso ny olona, ny fiarahamonina ary ny tontolo iainana

F FIFEHEZANA NY FIHETSEHAM-PO

86

	AMBARATONGA I	AMBARATONGA II
1	Tony hatrany ka tsy manao fihetsika tsy voahevitra ✓	Mahatana sy mahatratra am- pahamatorana fiadanan-tsaina
2	Mifandray amin'ny olona ankitsim- po ka tsy mamely am-badika ✓	Mazava fo eo amin'ny fifandraisana amin'ny olona, tsy mitana alahelo ary tsy tia ady ✓
3	Mizatra manome tsy miandry valisoa na tambiny ✓	Manorina ny fahasambarany ao anatin'ny fifankatiavana hanampy ny hafa sy hanaja azy amin'ny maha izy azy ka tsy mitaky tambiny ✓
4	Manaja ny tovovavy ka tsy manao zavatra mety hanafintohana azy	Mahalala sy manaiky ary manaja ny fahasamihafan'ny toe-batan'ny lehilahy na vehivavy
5	Mahatsiaro ho raikitra adidy amin'ny tovovavy mifanerasera aminy ka manaiky hiaraka hanorina ny fiainan- ko avy aminy	Manaiky fa ny fanambadiana sy ny fianakaviana no fototry ny fiaraha- monina ary miezaka ny hanjakan'ny fifankatiavan'ny mpivady, ny mpianaka, sy ny mpiray tampo

FANEHOANA MPIANDALANA

Fanamiana

Anisan'ny mampiavaka ny skoto ny fanamiana. Haja amam-boninahitry ny Antily ny fahaizana manaja ny fanamiana. Tompon'andraikitra amin'izany fanajana izany ny rehetra ka raha misy manao fanamiana manala baraka na manome henatra ny fikambanana (mamo, misavika vehivavy, miady na manompa olona) dia tsy atao vita mora fa ifanazavana sy andraisana fanapahan-kevitra ao amin'ny fitanan-kaja. Mampisongadina ny fikambanana sy ny mpiandalana ny fanamiana ka dia tokony hotandrovana izany hajany izany. Tsy fitena an-davan'andro ny fanamiana.

Tarigetra ny fitoviana isam-pileovana, io no fenitra tratarina amin'ny fanamiana. Madio, tsy rovitra na miforiporitra no atao hoe mijijy. Fanamiana mijijy no entina amin'ny fihetsiketsehana rehetra :

Lobaka kaki
Pataloha mainty na manga antitra
Fehikibo hoditra
Fehitenda mizara roa araka ny lokon'ny fiondronana

Ny marika A.I.M. dia azo apetaka araka ny dingana vita.
Ireo marika tao amin'ny sampana zandriny dia tsy azo anaovana intsony.

Tsara ny manambara fa tsy grady akory ny marika.

Mari-belirano	paosy havia
mari-tsatroka	ambony paosy havia
marika iraisam-pirenana	paosy havanana
marika Afrika	ambony paosy havanana
ny marika Antily rehetra sy ny talenta	sandry havia


Ny Mpiandraikitra araka ny fiofanana vitany dia mitondra marika eo an-tsoroka :

- mpiandraikitra : tapa-damba mena eo amin'ny saiki-tsoroka
- mpiandraikitra mpanampy : tapa-damba mena mitapaka volon-davenona
- mpiandraikitra mianadrahara : tapa-bamba mena mitapaka volon-tsokolà.

Marihana fa tsy azo apetaka ny marika andraikitra raha tsy vita fanasinana na lasy fanofanana ka nankatoavina.



Fanevam-pokonolona



Tehin'ny Mpiandalana

Ny tehinina, hazo lava mirefy 1,50 m, omena ny mpiandalana vita velirano dia milaza :

- ny fahavononany hamaki-vaky ny lalam-piainany
- ny fanapahan-kevitra tsy maintsy raisiny manoloana ny sampanandalana asehon' ny bakany roa.

Fandraisana ny beazina vaovao

Ny andro voalohany indrindra idirany ato amin'ny sampan'ny «lalana» dia raisina tsotra fotsiny ny beazina. Avela izy aloha hahafantatra ny fiainana ao. Tsara raha tsy entina milasy avy hatrany izy. Rehefa hita ny fahazotoany sy ny finivavany handray ny fanabeazana sy ny fandrosoany vao omena azy ny fehitenda, lanonana tsotra nefa voalamina tsara no anaovana izany.

1- Fampiakarana ho Mpiandalana

Mpamakilay miakatra

Ny mpanatrika :

Mpiandraikitra Rodona - Mpiandraikitra Fokonolona.

Ny Rodona sy ny Fokonolona manontolo.

Ny fitaovana :

Fanevam-pikambanana na ny an'ny isan-tsampana.

Tady sy famaky ary angady ho an'ilay zatovo hiakatra.

Famorianana :

Sokera Fokonolona.

Sokera Rodona.

Tari-dresaka :

Tsara ho fantatsika rehetra izay manatrika etoana fa noho ny zara taona samy manana ny azy no antony izaràna ho sampana Mpamakilay sy Mpiandalana.

Ka ny Sampana Mpamakilay dia ny zatovo : 15-17 taona ary ny Sampana Mpiandalana kôsa dia tanora : 17 - 21 taona.

Samy manana ny filàna sy ny hetahetany avy ireo.

Rehefa feno 17 taona ny Mpamakilay dia akarina ho Mpiandalana mba hitohizan'ny fanabeazana Antily sy hahatomombana azy.

Fanazavana :

Manao famorianana sokera roa mifanatrika ny Rodona sy ny Fokonolona ka rehefa vonona dia antsoina ho eo afovoan'ny Rodona ireo hiakatra ho Mpiandalana. Dia aroso ny resaka ifamalian'ny Mpiandraikitra sy ilay Mpamakilay hiakatra. Rehefa izany dia mitodika any amin'ny Mpiandraikitra Fokonolona ny Mpiandraikitra Rodona .

Rehefa manaiky ireo dia esorin'ilay zatovo ny marika maha-Antily Mpamakilay azy, ary omeny ny Mpiandraikitra Rodona. Ireo kosa hanome azy tady, famaky, angady, ... ho marika fa hanao " Lalana" izy eo amin'ny fiainana. Dia miditra ao amin'ny Fokonolona ireo Zatovo, mikisaka ho andaniny roa ny Mpiandraikitra,

bahanan'ny loham-pileovana anefa ny lalana ka miditra an-keriny izy ireo; rehefa tafiditra izy dia mitehaka ny rehetra : voaray ao amin'ny Fokonolona izy. Dia redonina amin'izay ny hiaka isan-tsampana sy iombonana.

Mpiandraikitra Rodona : RA...

Zatovo : Inty aho.

Mpiandraikitra Rodona : Efa an-taonany maro izao no niainan'ialahy ny fanabeazana sampana Mpamakilay, ka niezahan'ialahy ho Antily Mpamakilay. Hatreo aloha ny fanabeazana Sampana Mpamakilay izay nitakiana fahavononana mbamin'ny fahatokisan-tena. Ka inona izao no azon'ialahy ambara ?

Zatovo : Nandray fanabeazana tato amin'ny Sampana Mpamakilay aho. Mahafinaritra tokoa ny fiainan'ny Mpamakilay. Ny Antily anefa miezaka ny hanao tsaratsara kokoa hatrany.

Mpiandraikitra Rodona : Eny, tapitra ny fahazazana ka mandroso hatrany ho any amin'ny fahatanorana ialahy. Hahatomombana ny fanabeazana antily ho an'ialahy dia faly izahay manolotra ny Sampan'ny Mpiandalana indray ho an'ialahy.

Zatovo : Misaotra ary mankasitraka ny Sampana Mpamakilay aho fa handeha hikatroka ao amin'ny Sampana Mpiandalana indray izao, ka indro ny marika maha-Antily Mpamakilay ahy atolotro an'ialahy.

Mpiandraikitra Rodona : Misaotra an'ialahy ary mankahery an'ialahy. Mpiandalana no iantsoana an'ialahy manomboka izao. Koa indro misy fitaovana vitsivitsy, atolotry ny Sampana Mpamakilay. (Mifanao veloma Antily izy ireo ary mitodika any amin'ny Rodona)

Mpiandraikitra Rodona : Ry zandry Mpamakilay, ny sampana no miova fa ny fanabeazana kosa hitohy. Asehoy anay aloha fa tena ho Antily Mpiandalana vonona mandrakariva ianareo. (Mandray ny tanan'ilay Mpiandraikitra Fokonolona ilay zatovo ary dia manao tokim-panompoana, manavao ny Famehezan-tena Antily Mpamakilay)

2- Fandraisana velirano

Ankalamanjana ary am-pahibemaso no andraisana ny velirano mpiandalana, nefa raha tsy afaka hanatrika ny velirano ny RAP, dia azo raisina any ampiangonana ny tso-dranon'ny zatovo.

Loholona : Voninahitra ho anay ny mangataka an'ialahy Mpiandraikitra fokonolona

(na filohan-tsampana) mba handray ny veliranon'ireto tanora ireto (antsoina tsirairay ireo hanao velirano).

X Mpiandalana (TAN) : Inty aho (mandroso izy dia mijanona tokony ho dingana efatra (4) manoloana an'ilay Mpiandraikitra na filoha handray ny velirano).

Mpiandraikitra na filoha (MP) : Inona no hangatahinareo ?

TAN : Hanao velirano.

Mp : Efa nahita sy nanombana ny fiainan'ny Antily Mpiandalana ialahy (ianareo) izao, hatramin'izay niarahanao (nareo) taminay izay, ary indro ankehitriny fa mangataka hanao velirano, satria tapa-kevitra ho tonga Antily Mpiandalana tahaka anay koa. Fisafidianana lehibe tokoa izany, koa manontany an'ialahy (anareo) amin'ny alalan'ny fikambanana Antily aho, ho pôrofo fa am-pitiavana sy am-pahafantarana tanteraka ny skotisma no idiranao (nareo) eto amin'ny fikambanana. Fantatrareo ve ny baikon'ny Mpiandalana?

TAN : Vonona mandrakariva.

MP : Inona no hevitr'izany?

TAN : Tsy maintsy mikely aina aho mba ho vonona hanefa ny adidiko.

MP : Hangataka ho tonga Antily Mpiandalana ianao (ianareo) mba haninona?

TAN : Mba hahombiazako tanteraka amin'ny fanompoana an'Andriamanitra sy ny namako eo amin'ny fokonolona misy ahy.

MP : Fantatrareo ve ny tarigetran'ny Antily Mpiandalana?

TAN : Fantatray.

MP : Venteso àry.

TAN : Ny Mpiandalana dia fanasina sy fahazavana, ary ny asa izay hataony dia mikendry lalandava ny ho amin'ny tombontsoa iombonana hatrany.



MP : Fantatrareo sy hainareo ve ny fitsipika sy ny lalàna mifehy ny Antily Mpiandalana?

TAN : Eny fantatray sy hainay.

MP : Venteso àry.

TAN : (Ventesina miaraka tsara sy miadana ny fitsipika sy ny lalàna)

Fitsipika :

- 1- Mirehareha sy miraiki-po amin'ny finoany ny Antily Mpiandalana.
- 2- Tia Tanindrazana ary manao izay hampijoro an'i Madagasikara ny Antily Mpiandalana.
- 3- Ao an-trano no voalohan'adidin'ny Antily Mpiandalana.

Lalàna :

- 1- Mendrika itokisana no hasin'ny Mpiandalana ✓
- 2- Miray hina sy tsy mivadika amin'ny Tanindrazany, ny Ray aman-dReniny, ny lehibeny ary ny olom-peheziny ny Mpiandalana ✓
- 3- Natao hanompo sy hamonjy ny namany ny Mpiandalana ✓
- 4- Mahalala fomba ary mitandro ny hajany ny Mpiandalana ✓
- 5- Havan'ny olon-drehetra ary Mpirahalaha daholo ny Mpiandalana ✓
- 6- Tia sy mankafy ny zava-boaary, an'Andriamanitra ny Mpiandalana ✓
- 7- Manaiky avy hatrany ary mandavorary ny ataony rehetra ny Mpiandalana ✓
- 8- Mahatsindry fo sy mahafehy tena ka mitsiky sy mirana raha sendra ny sarotra ny Mpiandalana ✓
- 9- Mahay mitsitsy sy mitandrana ny zavatr'olona ny Mpiandalana ✓
- 10- Madio fiteny, madio fihevitra ary madio fitondran-tena ny Mpiandalana. ✓

MP : Noterena ve ianareo hiroso amin'izao velirano izao ?

TAN : Tsia, an-tsitrabo tokoa.

MP : Mandra-pahoviana?

TAN : Mandra-pahafaty.

MP : Matoky ny teninareo ary izahay ka manaiky ny anaovanareo velirano, nefa manatona aloha ny Ray am-panahy handray ny tso-dranon'Andriamanitra. (Manatona ny RAP dia mandohalika ireo hanao velirano)

RAP : Ny tso-dranon'Andriamanitra Ray, Zanaka sy Fanahy Masina amin'ny alalan'i Masina Maria Mpanjakavavin'ny Antily anie hirotsaka sy hitoetra ao aminareo.

TAN : Amen ! (Mitsangana dia mandroso tsirairay, mitana ny tehin'ny Mpiandalana misy ny fanevan'ny Fokonolona no manao fiarahabana Antily)

Miankina amin'ny fahasoavan'Andriamanitra aho ary manome toky fa ny hasin'ny tenako no hataoko antoka fa :

- Hanompo an'Andriamanitra sy ny tanindrazako
- Hanampy ny namako hatraiza hatraiza
- Hivelona ny fitsipika sy ny lalàna Antily mpiandalana
- Hikatsaka ny tombotsoa hiombonana eo amin'ny asa rehetra ataoko amin'ny maha mpiandalana ahy
- Ny tso-dranon'Andriamanitra no hangatahiko hanampy ahy amin'izany.

MP : Manomboka izao dia raisina ho Mpiandalana ialahy ary mpikambana feno ato amin'ny Antilin'i Madagasikara, ary ny Skoto rehetra eran'izao tontolo izao dia rahalahin'ialahy avokoa. Raiso ity marika ity fa vita velirano ialahy ary manentana an'ialahy hivelona izany mandra-pahafaty.

TAN : (Miarahaba amin'ny tanana havia sady manao ny arahaba Antily. Mitodika sady miarahaba ny mpanatrika rehetra)

MP : R..... ao amin'ny Fileovan'i.....
(Mandroso ny Loholona mandray ny Ekipany)

MP : Antilin'i Madagasikara vonona mandrakariva.

* REHETRA : Vonona.

- Hiran'ny velirano andininy rehetra

1 - Izao no dina ataoko
Hanome anao ry Tompo
Ny tenako manontolo
Ho anao manomboka anio

Fiv : Koa mianiana aho anio
Eto anatrehanao
Ho tia sy hanompo anao
Ry Jesoa Tompo ô

2 - Inty atolotro anao
An-kafaliam-be
Ny foko ho tia anao
Ka mba raiso ry Jesoa ô

3 - Hanompo ny tanindrazako
No ilofosako
Iomanako isan'andro
Mba handray ny adidiko

4 - Hanara-dia anao
No hijoroako
Hanompo sy hanasoa
Ireo rahalahiko

5 - Ianao no antenaiko
Ianao no heriko
Koa mba tantano aho
Ry Jesoa Zokiko

- Hiran'ny Mpiandalana : ITY NO LALANA

- 1 - Ity no lalana ry Zatovo
Miezaha manohy hatrany
Mieritreritra mba hanovo
Zava-tsoa iantsoana anao

Fiv : O lalanay, lalanay e
Herinay e, lalana mazava
No izoranay lalandava
Mandra-pahafatinay

- 2 - Raha mafana ny fon'ialahy
Maniry fahombiazana
Dia ho afaka sy ho sahy
Araho hatrany ny lalana.

- 3 - Fitiavana no hameno
Ny fo te-hisahirana
Hafaliana no ho heno
Amin'ny hira hiraiana

3- Fandraisana dingana

Fantatsika fa dingana telo (3) no misy ato amin'ny sampana lalana

1°/ Miara-dalana

2°/ Mpiana-dalana

3°/ Mpiandalana

Tsy maintsy mahavita ireo fepetra takiana ao amin'ny "teti-pibeazana" ary neken'ny fitanan-kaja vao miroso amin'izany. Mitovy avokoa ny fandraisana ny dingana telo(3).

LOHOLONA : Voninahitra ho anay ny mangataka an'ialahy handray ny dingan'ireto zatovo ireto (antsoina tsirairay ireo zatovo)

ZATOVO : Inty aho.

MPANDRAY : Inona no hangatahinareo?

ZATOVO : Hiroso eo amin'ny dingan'ny (tononina izay dingana hirosoana)

MPANDRAY : Fantatrareo ve ny adidy miandry nareo amin'izany sy izay takiana aminareo amin'izany.

ZATOVO : Eny fantatray sy ataonay an-tsitraro.

MPANDRAY : Matoky ny fianianana ataonareo sy ny teninareo izahay koa dia

manaiky ny hirosoanareo eo amin'ny dingan'ny.....(tononina izay dingana hirosoany) nefa alohan'izany dia mandrosoa eo anoloan'ny fanevam-pokonolona manavao ny veliranon'ny Antily Mpiandalana (mandroso eo anoloan'ny faneva ary manao ny fiarahabana AIM).

MPIANDALANA : Miankina amin'ny fahasoavan'Andriamanitra aho ary manome toky fa ny hasin'ny tenako no hataoko antoka fa :

- Hanompo an'andriamanitra sy ny tanindrazako
- Hanampy ny namako hatraiza hatraiza
- Hivelona ny fitsipika sy ny lalàna Antily mpiandalana
- Hikatsaka ny tombotsoa hiombonana eo amin'ny asa rehetra ataoko amin'ny maha mpiandalana ahy
- Ny tso-dranon'Andriamanitra no hangatahiko hanampy ahy amin'izany.

MPANDRAY : Manomboka androany ialahy dia anisan'ireo zatovo ao amin'ny dingan'ny.....(tononina ilay dingana atao) koa aoka ny fihetsika sy ny toetra asehon'ialahy ho tonga ohatra velona ho an'ny rahalahin'ialahy ato amin'ny sampan'ny lalana sy ny fikambanana ary ny fiaraha-monina ifaneraseran'ialahy (sady manao fiarahabana no mametaka ny marika).

4- Fiaingana

Tsy napetraka ho dingana ny FIAINGANA fa TANJONA hotratrarin'ny Mpiandalana rehetra.

Fepetra takiana :

- Matotra mahafehy tena
- Marina amin'ny fiainana rehetra
- Ara-dalana ara-pianakaviana (soratra, mariazy...)
- Manana antom-pivelomana marim-pototra
- Miaraka amin'ny mpiahy «parrain» efa vita velirano amin'ny fanomanana ny fiaingana, mety ho amam-bolana na aman-taonany no hanaovana izany fa alohan'ny 21 taona
- Andro alina no anaovana ny seremonian'ny fiaingana tain-kilanja 2 na 4 no manazava ny rehetra
- An-tsampanana mangina no toerana tsara fidina
- Manao sokera efa-joro ny Mpiandalana tsy mbola nanao fiaingana
- Ny filoha sy ny mpiandraikitra ary ny Ray am-panahy no manatrika ny sokera
- Ireo efa nahavita ny fiaingana kosa andamosiny samy mitondra ny SKALPA (misy ny lokon'ny sampana) daholo
- Raha be indrindra 2 ihany no miara-miainga
- Ny FOIBE no mitarika ny lanonana
- Ny filoha no miteny amin'ny mpiandalana :

FILOHA : RA.....Indro ialahy hiainga hiditra amin'ny fiainana. Tato amin'ny

fokonolon'ny Mpiandalana ialahy nianatra, niofana, niomana ho tonga lehilahy; vonona ialahy izao hivelona araka ny fomba sy ny toetsain'ny Mpiandalana. Alohan'ny andraisako ny famehezan-tenan'ialahy eo anatrehan'ny fokonolona manatri-maso ny fiofanana nataon'ialahy, avelao aho hampahatsiahy an'ialahy amin'ny anaran'izy ireo ny takian'ny lalana amin'ialahy :

Sitrak'ialahy ve ny hitana ny vatan'ialahy mavitrika sy mahalala onona tsy andevozin'ny aingitraingitry ny fitadiavam-pahafinaretana, ka hahantra am-panahy mandritra ny andro rehetra iainan'ialahy ?

TAN : Sitrako izany.

FILOHA : Tsapan'ialahy tsara ve amin'ny fankamamiana sy fisitahana amin'ny fiainana ankalamanjana fa tsy sangisangy akory ny antsika ary tsy mba sitraky ny Mpiandalana ny kobaka am-bava sy ny volana an-tenda ? Manome toky ve ialahy fa ho marina mandrakariva amin'ny hevitra sy ny asa ataon'ialahy ?

TAN : Manome toky aho.

FILOHA : Tsapan'ialahy tsara ve raha miara-mihafy tamin'izay sahirana isika mandritra ny vadi-bainga sy ny fanompoana nikatrohantsika, fa tsy vosobosotra akory ny fiainana ka tsy vitavita foana, ary mamatotra azy lalandava ny asa natao sy ny teny voalazan'ny mpiandalana ?

TAN : Tsapako tsara izany.

FILOHA : Tsapan'ialahy tsara ve tamin'ny asa sy ny ady hevitra nataontsika fa liana ny fahamarinana ny mpiandalana ka tsy afa-po amin'ny eo ho eo ary tsy afaka ny tsy hanadihady ny hevitra aroso aminy ? Sitrak'ialahy ve ny hikatoka ny marina am-panetren-tena sy hanompo-azy am-pahalalana nefa tsy hanitsakitsaka izay tsy mitovy hevitra amin'ialahy ?

TAN : Tiako izany.

FILOHA : Tsapan'ialahy tsara ve tamin'ny fikezahana niarahantsika nanao fa tsy afa-po amin'izay vita ary tsy mihevi-tena ho tonga amin'ny fanaperana na oviana na ovina ny mpiandalana ?

TAN : Tiako izany.

FILOHA : Tsapan'ialahy tsara ve teto amin'ny fifankatiavan'ny fokonolon'ny Mpiandalana na tany amin'ny fihaonana nataon'ialahy samy irery na niarahana, fa tsy manan-tsahala ny olona tsirairay, ary na dia izay mavomavo indrindra amin'izy ireny aza manam-panahy, nataon'Andriamanitra mitovy endrika aminy ka mendrika hotiavina ?

TAN : Tsapako izany.

FILOHA : Tapa-kevitra ve ialahy fa hifandray am-pitiavana amin'ny tsirairay avy ary haka fianarana amin'ny olon-drehetra ?

TAN : Tapa-kevitra aho.

FILOHA : Tsapan'ialahy tsara ve amin'ny fahatsiarovana ny fahalemen'ialahy, fa tsy mitsara ny namana no anjaran'ialahy fa mampiseho fitiavana sy halemam-panahy aminy ? Manome toky ve ialahy fa hitady amin-kitsim-po izay hatsaram-panahy ao amin'ny sasany ho voninahitr'Andriamanitra ary handefitra ho fitiavana

azy, ny kileman'izy ireo sy ny hadisoany ?

TAN : Manome toky aho.

FILOHA : Farany, tapa-kevitra ve ialahy araka izay azo atao handray ny antondraharaha sy ny fanambadiana, na ny fanokanan-tena amin'ny raharaha masina ho fiantsoana avy amin'Andriamanitra, ka hivelona amin'izany ho toy ny fanompoana ny Tanindrazana sy ny Eglizy ?

TAN : Tapa-kevitra aho.

5- Fandraisana ny fiaingana

Mandroso manatona ny mpiandraikitra fokonolona sy ny Ray am-panahy ilay Mpiandalana ary mametraka ny kotrany eo anoloany. Ny Filoha no manontany ny Mpiandraikitra sy ny mpiandalana rehetra.

FILOHA : Ekenateo ve ny hanaovan-dRA..... ny Fiaingana ?

REHETRA : Ekenay.

FILOHA : Andriamanitra anie hanome ny fahasoavany hahatanan'ialahy hatramin'ny farany ny famehezan-tenan'ialahy. Tsy ho very hasina noho ny fahotana na ny fahakiviana, na ny harena sy ny voninahitra anie ny antson'Andriamanitra.

Mihaingà ary ka midira ao amin'ny fokonolona amin'ny maha mpiandalana an'ialahy.

MPIANDALANA : Fantatro fa ny hajan'olombelona dia ny mitana ny teny napetrany. Mahalala ny fahalemeko aho ka mitalaho ny fahasoavan'Andriamanitra ary mamehy tena fa : hijoro ho lehilahy sy ho mpiandalana kristianina malagasy mandritra ny fiainako manontolo.

FILOHA : Raiso ny vatsy ho tohan'ain'ialahy eny an-dalana, fambaran'ny fifampiankinan'ny olombelona. Feo miantso an'ialahy iny hiasa, hiantsona ary hiady ho an'ny rariny. Aza hadinoina fa misy vatsy hafa koa dia ny Eokaristia, izay ilaina bebe kokoa noho ny amin'ny fiainana (omena azy ny vatsy).

Raiso ny trano lay ho fialofana eny an-dalana hampatsiaro an'ialahy fa tsy natao ho fonenana mandrakizay akory eto an-tany (omena azy ny lay afatony amin'ny kotrany, toloran'ny RAP Baiboly na testamenta vaovao izay avy amin'ny fokonolona izy ary ampidiriny ao anaty kotra ihany koa izany).

Raiso ny fanazavana ny haizina eny an-dalana ary ataovy mampirapiratra amin'ny fiainan'ialahy ny fahamarinana satria ao amin'ialahy ny Tompo izay fahazavan'izao tontolo izao (omena jiro mirehitra izy).

Farany, raiso ity marika ity, famantarana ny mpiandalana rehetra eran'izao tontolo izao iny hampahatsiaro an'ialahy izay toetra tokony tsy ho levona ao amin'ialahy, na dia mitombo taona aza. Mavo lokon'ny lovitao, lokon'ny masoandro mba hamiratra tahaka azy ny hafalian'ialahy. Maitso lokon'ny mpianjoria, lokon'izay rehetra mitombo, mba hoentin'izay fanantenana mandroso aloha hatrany ny dian'ialahy. Manga lokon'ny Mpamakilay, fahombiazana mba ho olomanga

reharehan'ny Malagasy rehetra ialahy. Mena lokon'ny Mpiandalana, lokon'ny rà, lokon'ny fitiavana mba tsy hisy hotsitsian'ialahy ireo mandritra ny andro rehetra omen'Andriamanitra an'ialahy. Sahy maty ny Mpiandalana nefa tadidio fa indraindray tsy mora akory ny miaina, ary izao ry rahalahy mandehana ka vitao soa ny làlana.

MPIANDALANA : Ray ô ! tsy handeha aho raha tsy mahazo ny tso-dranonao (mandohalika).

RAP : "Ndeha ary tano ny tenin'Andriamanitra ary hitokiso ny fampanantenany " Sambatra ny mahantra am-panahy fa azy ireo ny fanjakan'ny lanitra. Sambatra izay mitomany fa halàna alahelo izy. Sambatra ny malemy fanahy fa izy no handova ny tany. Sambatra ny madio fo fa hahita an'Andriamanitra. Sambatra ianareo raha ozonina sy ampingaina noho ny amiko.

Izany teny izany dia aza tazonina ho anao irery, torio ny vaovao mahafaly dia Andriamanitra hitondra famonjena ho antsika. Omeo hanina ny noana, omeo rano izay mangetaheta, ampiantranoy izay mandom-baravarana, tafio izay tsy manankotafiana, vangio ny marary, ampio izay migadra, ary raha enjehina noho i Jesoa Kristy ianao, aza manomana na inona na inona ho fiarovana, fa hatoro an'ialahy izay tokony holazaina eo am-pitsarana, satria tsy ialahy no hiteny fa ny fanahin'ny Ray no hiteny ao amin'ialahy.

Tadidio fa handeha mankany amin'ireny tanàna misy ny hakamoana mandrakizay ny lalana ombanao eto an-tany ary tsy hahita fialan-tsasatra ianao raha tsy any amin'ilay toerana sambatra, iriariavan'ny olo-masina voahomana ho anao.


Ndeha ary araho i Kristy fa izy no hampita ny olombelona ho tonga ao amin'ny hafalian'Andriamanitra. Ny Andriambavy Maria Virjiny, ilay kintana fitarikandro anie hitari-dàlana anao. Paoly Apostoly hiara-dia amina, ny olo-masina an-tapitrisa avy amin'ny taona rehetra sy avy amin'ny firenena rehetra hanotrana anao anie, rahampitso hatrany amin'ny mandrakizay (sady mitso-drano azy izy)

MPIANDALANA : Amen

(mitsangana izy, manao an-tsoroka ny kotra, mandray tanana ny Mpiandalana rehetra efa vita fiaingana, sokafana ho azy ny làlanalasa izy)

Ny fokonolona miray fo sy mihira :

« Ity no lalana ry Zatovo »



FIZAHAN-TAKELAKA

TENY MIALOHA

NY NIANDOHAN'NY SKOTISMA

NY FOMBA FANABEAZANA SKOTO SY NY TETI-PIBEAZANA
MPIANDALANA

. Ny fomba fanabeazana Antily	7
- Ny fomba fanabeazana amin'ny alalan'ny lahaşa	8
- Fifandraisan'ny beazina sy ny mpanabe	12
- Fiainana an-kalamanjana	15
- Ny tontolon'ny nofy sy ny eritreritra	18
- Ny fiainana an-tarika	20
- Lalàna sy velirano	23
- Fisondrotana isam-batan'olona	26
. Vokatra hotratrarina ara-panabeazana	31

FANEHOANA MPIANDALANA

- Fanamiana	38
- Fanevam-pokonolona	39
- Fampiakarana ho mpiandalana	40
- Fandraisana velirano	41
- Fandraisana dingana	45
- Fiaingana	46
- Fandraisana ny fiaingana	48